



## TAPAK 8

Australian PM nungi tenzuka nuburtem  
nem coronavirus mozü agütsür

## TAPAK 10

Novak Djokovic-i  
Australian Open kokogo



VOL. XVIII NO. 129 (ADOK 129) DIMAPUR

TENTONÜ (MONDAY)

TSÜKLAI (FEBRUARY) 22, 2021

₹ 5.00

## COVID-19 Nagaland: Nisung 13 anepaludar

**Kohima, February 21 (TYO):** Nagaland nung anogo ananü nisung shinga dak COVID-91 meputetba sülen Deobarnü nisung ka dak putetogo. Ajisüaka, tanü nisung 6 taneptsü anguba agi tang anepalur nisung 13 dang kümogo.

"Tanü Kohima nung nisung ka dak COVID-19 aliba putet. Maneni, Kohima nung nisung 6 taneptsü angu" ta Health & Family Welfare Minister, S Pangnyu Phom-i ashi.

"Nisung 12,192 rongnungi 11,936 taneptsü nguogo aser iba ajanga Nagaland nung taneptsü angur 97.90 % lir" ta Health & Family Welfare Director, Dr Denis Hangsing-i metetdaksü.

Nisung 91 asüba nungi parnok 10 bo tanga timtem ajanga asü aser nisung 152 tanga state temi ogo, ta paisha ashi.

Tang Kohima nung nisung 11 aser Dimapur nung nisung 2 anepaludar, ta Dr Hangsing-isa metetdaksü.

Shirangertem rongnung Dimapur nung nisung ka dak

shirangba yimya tera lir aser 11 dakbo shirangba yimya kecha mali, ta paisha shisem.

Taneptsü angurtem: Dimapur (6,338), Kohima (3,798), Mon (594), Peren (506), Tuensang (246), Mokokchung (183), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,29,164 tendangogo. RT-PCR ajanga sample 74,609, TrueNat ajanga sample 37,305 aser Rapid Antigen Test ajanga sample 17,250 tendang" ta Dr Hangsing-isa ashi.

"Honibar tashi nung Nagaland nung nisung 21,481 nem COVISHIELD vaccine indang dose 25,390 agütsüogo. Vaccine agütsürtemji frontline workers 12,777 aser healthcare workers 8,704 lir," ta State Immunization Officer, Dr Ritu Thurr-i metetdaksü.

"Healthcare workers rongnungi parnok 3,909-i COVID-19 vaccine indang tanabuba dose agiogo" ta Dr Thurr-isa ashi.

## Totzü jenjang atuba ya tashiyim agi sen saruba den kasa: Sonia Gandhi

**New Delhi, February 21 (Agencies):** Congress interim president Sonia Gandhi-i Prime Minister Narendra Modi dang petrol aser diesel nung jenjang atuba ya tashiyim agi sen saruba den tepila mali ta shia shidi ka zülüogo.

"Sorkari nübortem timtemba aser kangshiba nungi tajangzük agir" ta Sonia Gandhi-i linük nung totzü jenjang atuba atema tebilemtsü bena shidiji zülü.

"Totzü jenjang tasaktiba kümogo. Linük kübok tesem aika nung petrol litre nung Rs 100 adenogo. Diesel nung jenjang atuba ajanga aluyimer million aika timtemdaksür. International crude oil jenjang ajemaka linük nung totzü jenjang kanga agi talila kümogo" ta laisa PM Modi dang ashi.

Taoba mapang Congress-i aniba Centre sorkar alidang international crude oil jenjang dang nungi tang tesadang kati tajemba lir, ta Sonia-isa metetdaksü.

Anogo 12 atongtepa petrol aser diesel jenjang atuba maneni aser Maharashtra kübok Mumbai nungbo petrol litre nung Rs 97 aser diesel litre nung Rs 88 kümogo.

Küm 20 sülen yaküm international oil jenjang ajema kümaka sorkari petrol aser diesel nung central excise duty kanga ajungketogo.

"Tesüiba küm 6 ser tesadang nung nür sorkari diesel nung excise duty 820% aser petrol

258% tema agiogo aser iba ajanga Rs 21 lakh crore bendenogo. Ajisüaka, public nungi senji agiaka, parnok nem tajangzük kecha magütsü" ta Sonia-i PM Modi dang ashi.

"India nung tanü mapa aika samaogo, taa aser sen arulen mali kümogo. Iba ajanga nübortem kanga timtemer. Ajisüaka, nür sorkari petrol aser diesel nung excise duty talila agir" ta laisa shidi nung shia lir.

"Nür sorkari petrol litre shia nung Rs 33 aser diesel litre shia nung Rs 32 excise duty agir aser ibaji petrol o diesel indang base price dang nungi timba lir. Iba ya rongsenkettsüng maparen tim mesüi inyakba nembangtsü atema tashiyim agi sen saruba inyakim lir" ta Sonia-i PM Modi dang ashi.

"Nübortem timtemdakja sorkar kati kodaser yamai mebilemdangi aser aria mebilemi mapa inyaker ta ratar" ta laisa shisem.

"Excise duty ajemer totzü jenjang meyipa reprangshiang aser iba tajangzükji middle class aser itasen agirtem, aluyimertem aser sensaker nem agüjang. Rongsenkettsüng jenjang mejungi akümba, mapa manguba, taa ajemba aser mapa inyakdak mangurtemji item ya lir" ta Sonia-isa takhangba agütsü.

"Nür sorkari tatemtsü mebushii telemtetba tajung agitsü atema tang ya mapang lir. India nungeri iba dang nungi tajungba temsüa lir" ta laisa ashi.

## Nagaland nung Rs 215 crore tim mesüi amshiba ken o 36 lir: CAG

**Kohima, February 21 (TYO):** March 2019 tashi nung Nagaland nung sorkar sen Rs 215.89 crore tim mesüi amshiba ken o 36 benoka lir. Shitakbabo Rs 218.56 crore tim mesüi amshi saka iba nungi Rs 2.67 crore ngutetogo.

Ken o 36 rongnung 30 ji sen tim mesüi amshiba aser akoksaba, 4 ji auyaba aser 2 ketdangsüri sen tim mesüi amshiba lir, ta Comptroller and Auditor General (CAG) of India-i metetdaksüogo.

Küm 10 tashi nung department balala anema ken o tem benokba:

Health & Family Welfare - 6, School Education & Rural

Development - 4, PWD (Roads and Bridges) - 3, Tourism - 2, Public Health Engineering - 2, Municipal Affairs - 2, Taxes - 2, Power - 1, Planning & Coordination - 1, Land Records & Survey - 1, Urban Development - 1, Technical Education - 1, PWD (National Highways) - 1, Woman Resources Development - 1, Information & Public Relations -1 aser Private Firms - 1.

Department ken o 26 nung Rs 203.61 crore tim mesüi amshiba aser akoksaba atema bushisüngdang saka department-i Rs 93 lakh alangba ken o 6 atema

mapa meinyak. Ano, Rs 11 lakh meyipa anguba atema tetuyuba magütsü aser Rs 13.91 crore alangba ken o ana okadak benoka angadangdar, ta CAG-isa metetdaksüogo.

Department balala nung sen tim mesüi amshiba rongnung timtembaji School Education Department nung lir. Iba Department nung sen tim mesüi amshiba ken o ana, auyaba ken o ka aser sorkar osset samaba ken o ka lir aser ajakji meyokteper Rs 82.96 crore adoker. December 2019 tashi nung Rs 57 lakh ngutetogo, ta CAG report nungsa shia lir.

## Küm 39 tashi Departmental Commercial Undertakings-i senotsü osang magütsür

**Kohima, February 21 (TYO):** Nagaland nung department balalai reprangba Government Commercial Undertakings 8-i küm aika Proforma Accounts magütsü ta Comptroller and Auditor General (CAG)-i metetdaksü.

Financial year 2012-13 nung CAG on State Finances-i Proforma Accounts atema osang agütsü saka March 2019 tashi nung Department temi küm 2 nungi tenzük küm 38 tashi Proforma Accounts magütsü arur, ta CAG report nung shia lir.

Küm 2 nungi 39 tashi Proforma Accounts magütsüba department tem:

# Nagaland Power Department-i küm ana magütsü. (2017-18 nungi 2018-19)

# Nagaland State Transport Department-i küm 6 magütsü. (2013-14 nungi 2018-19)

# Agriculture Department kübok Farms: Kuthur nung Potato Seed Farm-i küm 20 magütsü (1999-01 nungi 2018-19), Seed Farm, Tizit-i küm 19 magütsü (2000-01 nungi 2018-19) aser Medium Size Seed Farm, Merapani-i

küm 18 magütsü (2001-02 nungi 2018-19).

# Changki Valley Fruit Preservation Factory-i küm 13 magütsü. (2006-07 nungi 2018-19)

# Timber Treatment and Seasoning Plant Dimapur aser Government Cottage industries Emporia, Kohima-i küm 21 magütsü. (1998-99 nungi 2018-19)

# Veterinary and Animal Husbandry Department kübok Farms: Cattle Breeding Farm Medziphema, Cattle Breeding Farm Tuensang, Cattle Breeding Farm Aliba, Chick Rearing Centre (with Hatchery unit) Mokokchung, Chick Rearing Centre (with Hatchery unit) Dimapur, Regional Rabbit Breeding Farm Jharnapani, Pig Breeding Centre Merangkong, Chick Rearing Centre Kohima, Pig Breeding Centre Sathuja, Cattle Breeding Farm Baghty, Sheep Farm, Poilwa aser Buffalo Farm Jalukie küm 21 tashi magütsü (1998-99 nungi 2018-19).

# Pig Breeding Centre Medziphema aser Pig

Breeding Centre Tizit küm 22 years tashi magütsü. (1997-98 nungi 2018-19)

# Chick Rearing Centre Tuensang, Chick Rearing Centre Medziphema aser Pig Breeding Centre Tuensang-i küm 35 tashi magütsü. (1985-86 nungi 2018-19).

# Pig Breeding Centre Tuli-i küm 39 tashi magütsü. (1980-81 nungi 2018-19).

# Horticulture Department kübok Farm: Regional Progeny Orchard Lonnak-i küm 22 magütsü. (1987-88 nungi 2018-19).

Mapang shitak nung Accounts metembangba agi sorkari sen benokbaji Audit/State Legislature kübok madener. Iba jagi teinyaktsü mapatem meinyaktet aser mapang shitak nung Proforma Accounts magütsüba ajanga ashikülak mapa inyakba aser public sen tim mesüi amshiba jungkai adoka sayur, ta CAG-isa metetdaksüogo.

Departmental Commercial Undertakings aser Autonomous Bodies-i mapang shitak nung accounts renemtsüla aser iba atema state sorkari mapa akangkanga inyaktsü nüngdaker, ta CAG-isa metetdaksü.

## Nisung 2 metepseti atatsü: Paresh Baruah

**Guwahati, February 21 (Agencies):** ULFA-I-i totzü company nung mapa inyaker nisung ana tepsettsü lemtetba meinyaki atatsü ta Commander-in-Chief Paresh Baruah-i Deobarnü metetdaksüogo.

NSCN den olemtepa sülen telemtetba ka agitsü, ta Paresh Baruah-isa ashi.

Tanü Guwahati Press Club nung ULFA-I C-in-C Paresh Baruah-i osangbener den jembiba mapang Assam Police-i meinprong agütsü.

Guwahati Press Club nung Paresh Baruah-i telephone ajanga osangbener den

jembitsüba liasü saka Assam Police pur arur meinprong. Baruah-i jembitsüba phone number ji block asü.

Iba sülen pai tanga journalist ka dangi phone asü aser tang atema parnok i nisung ana tepsettsü sentong renemba anena atar ta ashi.

ULFA-I den NSCN-i Quippo Oil and Gas Infrastructure Limited nung mapa inyaker nisung ana tepsettsü ta taoba mapang amokmerena osang metetdakja liasü.

Tanü ULFA-I Commander-in-Chief-i iba osang metetdaksüba sülen Quippo oil

company nung mapa inyaker nisung ana kinungertem temolung anisüngzükogo.

ULFA-I-i Bihar nungi radio operator Ram Kumar aser drilling superintendent, Pranab Kumar Gogoi na pua lir.

"Olemtep nung tamakok anguba sülen ULFA-I aser NSCN/ GPRN-i nisung ana tepsettsü telemtetba agiogo" ta Hokolbarnü ULFA-I-i sangdong ka nung ashi.

Külen, BJP-i aniba Assam sorkari mepishiba dak alaka totzü company nung mapa inyaker ana chiokdaktsütsü atema mapa tajung kecha meinyaker.

## Reading in Context kaket sayaogo



Noksa nung Prof. L. Imsutoshi Jamir, Dr. Tamsüyanger Aier, Prof. Mar Pongener aser Dr. A. Temjen Jamir, Academic Dean, CTC nungertem angur.

**Dimapur, Tsüklai/February 21 (TYO):** Tribal Development and Communication Centre (TDCC), Mokokchung ajanga Reading in Context: 1 King 1:11 in a Contemporary Tribal World kaket ka sayaogo, koba Dr. Tamsüyanger Aier-i zülü aser Principal, Clark Theological College, Rev. Dr. Mar Pongener, Professor of History and Culture ajanga Multi-purpose Hall, Clark Theological College, Aolijen Mokokchung nung Deobarnü meshiteta

sarasademer sayatsü.

Kaket zülur Dr. Tamsüyanger Aier ya Clark Theological College, Aolijen, Mokokchung nung Department of Old Testament and biblical languages nung Associate Professor lir. Pa ya Kohima Science College, Jotsoma (NU) nung Bachelor of Science azüng, Eastern Theological College, Jorhat nung Bachelor of Divinity azüng, Master of Theology ya Gurukul Lutheran Theological College and

Research Institute, Chennai nung azüng aser Doctorate in Theology ya SATHRI/ Senate of Serampore College, West Bengal nung agia liasü. Pa ya mapang shia academic journal aser kaket balala nung olemsapang zülur ka lir.

Kaket züluri iba kaket nung Sociological Method amshia aser Solomonian period mapang loktiliba yimyatam angateta zülü aser tanü-asüng Naga nung lokti nung koba tashi teyari angutsü, ta asadanga zülü.

## KLBC nung N. Silubo Zeliang pastor ordain asü



February 21, 2021 nü Kohima Liangmai Baptist Church nung pastor ordain asüsang Rev. N. Silubo Zeliang den NBCC General Secretary Rev, Dr, Zelhou Keyho aser arogo tenzükertem on 21st February 2021.

**Dimapur, Tsüklai/February 21 (TYO):** Baptist Association Nagaland ajanga Kohima Liangmai Baptist Church nung pastor N. Silubo Zeliang ordain asüba sentong ka February 21, 2021 nü KLBC

tekiem kidang ayongzüka liasü. Iba ordination sentong ya Rev, Kitanwi Chawang Executive Secretary LBA ajanga ministerasü. Rev, Kitanwi Chawang-i sentong nung jembiba mapang, Khristar

wadang nung chichiba yimyajidangar tenzüksü molungsentsü aliba ya lir, ta ashi. Executive Secretary LBA Kitanwi-i pastor dang tanüla temeshi tashi nung iba wadang tenzüka pei sempet amshia Tsüngrem yimli ulushitsü ayongzüka liasü.

Pastor N. Silubo ya LBA tir la ama kümsük ana tashi inyakogo aser pa inyakba mapang LBA ajanaga 2020 küm NBCC mungdang ayongzüka liasü. Iba sentong nung NBCC General Secretary Rev, Dr, Zelhou Keyho dena liasü aser paia wadang ulushiba atema LBA dang pelaba lemsatop aser amangbapur dang tenzüker atema sarasademtsütsü ayongzüka liasü. Iba sentong nung Liangmai Bsptist Association kübon pastor anunga dena liasü.



Diphupar 'B' Ao Baptist Arogo, Dimapur nung February 21, 2021 amongnü Alima Tetsü Oshi Anogomung amongba sentong nung lanurtemi shilem agiba noksa nung angur. Iba sentong nung tongti o jembir Tir Yimyim yimozülur, Wb.K.Temjen Jamir liasü. Taküm 2021 küm alima tetsü oshi anogomung ya ABAM kübok aliba arogojem ajak nung tapet sentong balala agia mongogo.

## Assam Rifles temi shibelenba oset apu

**Dimapur, Tsüklai/February 21 (TYO):** Assam Rifles temi February 18, 2021 nü general area Lalmati, Kohima nung spot MVCP amenoka nisung ana pua liasü.

Osang tejangja kar nung ajemdaker Assam Rifles temi spot MVCP ka amenoka nisung ana apu aser tena ket nungi sen lakh 2.4 shi jenjang

Myanmarese Areca Nuts bag 15 tashi Tata (Regd No MN 01 AA 0209) ka nung bena aliba den sen 1,510 nguteta liasü.

Pua alisang den tena ket nungi ngutetba osettem ya maneni asündangyatsü asoshi Customs Department, Dimapur nem agütsüogo, ta sangdong ka ajanga ashi.

## Assam Rifles temi International Mother Language Day amung

**Dimapur, Tsüklai/February 21 (TYO):** HQ IGAR (North) kübok Assam Rifles, Khonsa Battalion ajanga February 21, 2021 nü Dadam yimtsüng nung International Mother Language Day ayongzüka munga liasü.

Oshi-oben aser sobaliba ajungkettsü nükjidong nung iba sentong ya ayongzüka liasü.

Yimdaklir dang pei tetsü oshi nüma danga amshitsü aser Solomonic period mapang loktiliba yimyatam angateta zülü aser tanü-asüng Naga nung lokti nung koba tashi teyari angutsü, ta asadanga zülü.

tetoktepba pei tetsü oshi aser sobaliba nung ajemdaker agia takok angur nem sempet agüja liasü.

Kasa sentong nungsa Indian Army aser Assam Rifles nung employment maongka balala aliba indang lanurtem nem metetdakja liasü.

Iba sentong nung yimdaklir nisung 80 shi dena liasü. Assam Rifles temi iba ama sentong ayongmesoa Assam Rifles temi iba sentong nung quiz pelaba lemsatopa liasü.

## P. Alem Jamiri züluba kaket ka saya



**Dimapur, Feb. 21 (TYO) :** Alima Ajunga Tetsü Oshi Anogomung February 21, 2021 sentong nung, Wb. P. Alem Jamiri züluba kaket "Mamatetba Küm Tatem School Benjong" sayaogo. Iba kaket ya Unity Village Ao Baptist Arogo (UVABA) tenla kidang Ao Senden Literature Board tezülur Wb. I. Temjen Tzüdiri sayatsü.

Iba kaket sayadang, "mapang balala nung kibok kisem mapang tanü asüng kibong ajak nung tanurtem mobile wara agi shirangba indang tsüraburtem shisabulua jembiba angashidang aser angudang, Tsüngremi kü nem tangatetba ka agütsü. Anungji yangji ajemdaker, tanü asüng smartphone tebilemtsü wara nungi jembua alitsü asoshi tsürabur aser tanurtem nem tangatetba kar agütsütsü nükjidong nung sarasadema iba kaket ya zülua lir," ta Wb. P. Alem Jamiri ashi. "Iba kaket ya ajanga nüburtem nem shisatsü tasen ka agütsütsü imlar," ta paisa ashi.

"Tanü ama alima ajunga

nung tetsü oshi anogo amungdang, asen tetsü oshi nung züluba kaket tajung ka sayaba ya asen Ao kin asoshi teinyaktetba kanga tulu," ta kaket sayatsür Wb. Tzüdiri ashi.

Tongtibangsa tanurtem asoshi, iba kaket nung ya Ao oshi angazüktsü atema footnote nung word meaning (Ao to English) 220 agüja lir. Iba kaket ya nüburtemi züngnütüsü yimdangjem otsü kanga junga yanglur tesem balala nung tapet noksatem enokja lir. Iba kaket ya sen 250/- agi angutsü.

Iba kaket ya UVABA sannüker Wb. L. Panger Jamiri meshiteta sarasademtsü. Tanü koba kaket ka sayaogo, ibai Wb. P. Alem Jamiri züluba kaket 9 buba alitsü. Ibai tanü asüng lima kibong nung tanurtem social media/mobile wara agi shirangba mapang nung teyari angutsüba kaket tajung ka asütsü ta imlar. Taoba mapangtem nung P. Alem Jamiri item kaket ya adoka lir. Genevieve in Ao Naga, Naro Molok (Translation), Taküm Yipru, etc.

# Congress-i petrol aser diesel jenjang atuba anema lungkak ait



Assam kübok Golaghat nung Lok Sabha MP Gaurav Gogoi-i anir Congress züngsemtemi lungkak aيتدang agiba noksa angur. (Golaghat, February 21)

**Guwahati, February 21 (Agencies):** Assam nung Congress-i "Axom Basaon Ahok" campaign nung shilem ka ama petrol o diesel nung jenjang atuba anema lungkak tesashiba aittsü tenzükogo.

Taruba Assam Assembly Elections atema Congress-i "Axom Basaon Ahok" campaign tenzüka lir.

Deobarnü Congress-i state ajungalen petrol aser diesel jenjang atuba anema lungkak ait.

Dibrugarh nung CLP leader Debabrata Saikia-i anir Congress züngsemtemi lungkak ait.

Congress züngsemtemi Dibrugarh kübok Seuppur nung Baruah aser Company Petrol Pump nung lungkak ait.

"Consumer temi agütsüba

tax ajemer ta sorkari metetdaksüogo saka petrol o diesel jenjangtem tanen makai atur. Sorkari petrol aser diesel jenjang atuba mazüokteter" ta Debabrata Saikia-i ashi.

"Kechisarena nung jenjang atuba ajanga nübortem timtemer, anungji BJP sorkari shiba atema tax agir? Iba sorkar yagi kechiba nübortem timtemdaksür" ta Saikia-isa metetdaksü.

Hojai nung Assam Congress President Ripun Bora aser taoba State Minister Rakibul Hussain nati anir lungkak ait.

"BJP-i Assam nung yimsüsüba mapang tatemleni arur kechiyong totzü nung jenjang atuba ajanga nübortem timtemdaksür" ta Ripun Bora-i ashi.

"Assam nung nübortemi totzü jenjang atuba anema ola adoker. Congress-i lungkak aitba sentong nung nisungtemi shilem agir. Sorkar ketdangsüba tenüng amer nisung timtemdaksüba ya Assam nungeri magizüker" ta Rakibul Hussain-ia metetdaksü.

Golaghat nung Lok Sabha MP Gaurav Gogoi-i anir lungkak ait.

"BJP sorkari totzü nung jenjang atuba ajanga public dang taochi melii auyazüker. Talisa wara mapang ka nung parnoki iba mapa inyaker. Assam nunger tenüng nung ni sorkar dang kechiba international crude oil jenjang ajemaka, petrol aser diesel jenjang atur? ta asüngdang" ta Gaurav Gogoi-ia ashi.

# Assam sorkari tesayur 580 regularize sütsütsü

**Guwahati, February 21 (Agencies):** 2001 küm nungi mapa nung anioker High School tesayur 580 shi indang service regularize sütsütsü atema Assam sorkari telemtetba agiogo.

Honibarnü, Chief Minister Sarbananda Sonowal-i anir ayongba Cabinet senden ka nung iba telemtetba ya agi.

Iba senden nung Cabinet-isa School 57 nung vocational teacher 101 indang service rule agizükogo, kong mapang shitak nung ita shia sen 28, 748 agütsütsü atema item tesayur temsüa kümtsüogo.

Iba den külemi, observation of formalities dak sendakba nung ASDMA employees tem regularize sütsütsü atema cabinet-i agizükogo.

Contract nung inyakertem, shirnok P&RD department nung tajemba agia küm 10 tenzüka aruogo, parnok nem arishi küm 60 tashi service

atsülangtsüogo. Iba maparen dak sendakba nung, Chief Minister-i report ka agütsütsü asoshi metetdaksüogo.

Cabinet ajanga agiba tanga telemtetba rongnung, Bodoland Administrative Staff College yanglutsü aser Department for Welfare of Bodoland ya department tasen ka ama ajatsü dena lir.

State sorkarisa Hatichung, Nagaone nung Srimanta Sankaradeva University dang ali bigha 239 melatsü, Guwahati nung Deepak Sangha nem ali katha 1 aser Kamrup nung World Renewal Spiritual Trust dang ali bigha 10 melatsü asoshi telemtetba agiogo.

Maneni, kasa senden nung Sorkari wheelchair 8000 alitsü telemtetba agiogo, koba aruya aliba general election aser iba sülen tanga maparen atema amshitsü.



Yaküm Galwan Valley nung Manipur nunger Indian Army Captain Soiba Maningba Rangnamei-i China's People's Liberation Army (PLA) sepaitem anema mapa tajung inyakba atema Manipur chief minister N Biren Singh-i tenüngsang agütsü. Manipur CM-i "Senapati District, Manipur nungi 16 Bihar Capt. Soiba Maningba Rangnamei den ajurutepeggo. Galwan nung Chinese PLA den raratepdang pai par jawantem anir noktak. Linük atema nai tasütait mapa inyakba ajanga asenok kanga nüma tangdaksüogo" ta Twitter nung 16 Bihar Regiment nungi army captain indang noksa sayua lemsatep.

# National curriculum nung NE putiotsü aser sobaliba bendenloktsüla



**NITI Aayog indang 6 buba Governing Council senden nung Arunachal Pradesh chief minister Pema Khandu agiba noksa angur.**

**Guwahati, February 21 (Agencies):** Northeast nungi Chief Minister anati national education curriculum nung Northeast tesem indang putiotsü, sobaliba aser yimsütem bendenloktsü atema shiogo.

Honibarnü Ato Kilonser Narendra Modi menden ser virtual sabang ajanga NITI Aayog indang 6 buba Governing Council senden agiba mapang Northeast chief minister temi

iba onük ya benok.

Meghalaya chief minister Conrad K. Sangma-i ashiba agi, class balala indang National syllabus nung Northeast tesem indang putiotsü aser sobaliba osangtem bendenloktsü nüngdaker.

"Iba mapatong ya mapa küma inyakra, linük nung nübur tsüngda telongjem tali dang ajungkettsütsü," ta Sangma-isa ashi.

Jenjang balala atema

Centre-i curriculum curriculum nung Northeast putiotsü aser sobaliba bendenloktsüla, ta Arunachal Pradesh chief minister Pema Khandu-i ashi.

Nüburtem dang Northeast putiotsü aser sobaliba metetdaksüba den külemi "Ek Bharat Shreshtha Bharat" indang chichiba tanela nung linük telongjem tali akangashidaksütsü, ta Khandu-i kuli sütsü.

# Hojai nung tanur dak tashiyim mapa inyaker ka apu

**Hojai, February 21 (Agencies):** Assam kübok Hojai district nung arishi küm 7 tanur tetsür ka dak tashiyim agi shi nung medema aser tepseta yutsü ta temulung melemi bilemba dak sendakba nung Honibarnü police-i arishi küm 30 tain tebur ka puogo.

Hokolbar aonung nungi tetsür tanur ya samadok aser Honibar anogo ang la tasümgang azü agi yimbanger ngutet.

Iba maparen dak sendakba nung pua alisang ya Joyprakash Kalar alias Munna ta jangjaogo aser pai tetsürla dak tashiyim agi shi nung medem aser la tepseta yutsü ta temulung melemi bilemer.

Osang ajanga angazükba agi, kiyimba sentong ka nung adentsü atema tetsür tanur ya Barhola nung lar kinunger

kidang munga liasü.

Iba kiyimba sentong agiba mapang, Hokolbar aonung tetsürla ya lar uncle'er kidang nungi samadok.

Iba osang angazükli dang, Hojai Police kiyimba tesem tonga aru aser bushisüngdangtsü tenzü.

Idangjisa, police-i teburgang ya apu aser Indian Penal Code kübok Protection of Children from Sexual Offences Act (POSCO) den nisung pur aoba, tashiyim amshia shi nung medemba aser nisung tepseta nung ajemdaker pa anema ken o benok.

Iba tesem nung atalokba lendong ajanga nübur kanga aoksadaksüogo aser lisopurtemi aibelena alisang anema tasüba agi merenshitsü takhangba agütsüogo.



## TIR YIMYIM YIMOBILEM (EDITORIAL)

DIMAPUR TENTONÜ, TSÜKLAI (FEBRUARY) 22, 2021

### GARI MAMSHIANG TAJUNGBA

**T**ang ajungbena ka gari totzü nung jenjang kaketa atuba yagi asenoki meteta aser memeteti maparen aika nung takoksa tulu ajurutsü ana nung lir. Joko, gari tozü petrol jenjang litre nung sen 90 dak tali aser diesel jenjang litre nung sen 80 dak tema akümdang asenoka gari amshiba nung kumdangtsüji kanga nüngdaka kumogo. Atangji, India nung adokba totzü kisüng agibo asenok meperir, anungji India nung atsükba totzü ya noklang nung shilem 85 (%) bo bendangertem dang nungi alir. Aji oda, bendanglen totzü nung sen jenjang atuba agi yangi asenoka atutsüsa akümer, anungji totzü meyaka atsüksüba dak alaka tangsa tangbo gari totzü nung jenjang ajema mangur. Atangji, takar state-tem nungbo alima ajaklen totzü nung sen tuaka, state government-i enoksemtsür nübortem dangbo jenjang tajemba nung ayoker, ajisüaka asen lima nungbo tangar dang nungi talila atutsüba dak alaka tajembo majemtettsü sudi. Joko, tangbo gari nung totzü litre 5 enok nunga sen 500 shibo adoktsü aser iba jagi talangka mesenzütettsü. Ibaji kodang bilemdangdir asenok aika asoshi gari mamshiang tajungba asütsüsa asadangtettsü. Tatishitsü agi, anogo ka nung gari totzü nung sen 500 endoktsüsa aküm nungbo, asenok kibong aikati ajibo matutsüa akok, anungji gari mamshiba tajungba asütsü. Atangji, gari mamshiba ajanga timtema aika ajurutsüa akok, saka asenoki gari totzü nung sen atuba tenüng nung gari melen tetsüng agi otetba tashibo tetsüng agidang jajatsü tenzükra, asen atemabo gari totzü jenjang atubaji tajangzükan asütsü. Ano, asenok lenden lima alir karibo gari melen amerlongtsü (bicycle)-ang alitsüa akok. Iba jagi asenok nem lenmang aisü nung tajangzükan agütsütsü. Joko, tanü putu ya nisung ajaki akok tashi tzü mopong memenendaktsütsü merangba putu ka lir, anungji tangatettertemibo akok tashi, kaa-itta aliyonga, gari nung masü tetsüng agi mesüra amerlongtsü nung jajar aser electric light dena akok tashi ajema atsüktsü meranger. Ano, gari nung masü saka tetsüng agi aser amerlongtsü nung jajabaji senotsü kümzüksü asoshi dangbo masü aser tzü mopong menendaktsütsü apayuba kija agia masü saka talisa asenok temang anema alitsü asoshi lir. Asenoki gari nung senzürtem o tetsüng agi jajartem na takümtem medemdangra, gari nung senzürtem dang nungibo tetsüng agi jajartem anema taliba aser arishi talangba aliba angutsü. Atangji, nisung taküm alitsü atema temang nung shilem ajak shitak tashi itta alitsü nüngdaker aser item rongnung tongtibang kaji tetsüng tashi itta alitsüla, kechiyong tetsüng agidang temang ajak bener jajar. Iba denji ano tetsüng temepu nung aliba tezü agi temang shilem poknüngbokra aser tenüktelen ajak den sentaktepa lir, anungji tetsüng ase temepuji teti arakzüka alitsü nüngdaker. Aji oda, tetsüng aser teloktep arakzüka kenyongi mejajai gari nung dang senzür aika tetsüng tashimait kümer peisasa menokdaktet shirang tenzüksü aser kopi melii arishi tembangtsü. Ibaji tanga tashidak atemba agi masü saka mejajaba agi temang marakzütet akümba timtem dang lir. Joko, item tajangzüktemji asenoki angateta akok tashi gari nung masü saka tetsüng agi jajatsü mulungtetdi aser gari mamshiba ajanga kümzüka yutetba sen jagiang asen nüngdak tanga mapa kar inyakdi mesüra mapa tajung kar asoshi tenla agütsüdi. Asenok ajaki gari totzü nung sen atuba tenüng nung gari ajema amshitsü tenzükdiker aser akok nungbo hopta nung anogo kabo mesüra anabo gari mamshiba mesüra gari nung kenyongi mejajaba anogo asütsü merangdi. Ashiko, asenok aikati tetsüng agi jajaba ya taaktsüka amai bilemtsüa akok saka aji mangatetba agi, kodang asenoki angatetdir gari nung senzübajiang mangatetertem mapa akümstsü. Asenoki asen lima tzü mopong merüka ayuba nung shilem tilaka danga aginüra aser asen taküm arrshia anema linüra aser akok tashi senotsü kümzüka yur mapa tajung inyaknüra, gari nung masü tetsüng agi jajaba sobaliba tenzüksüdi aser gari melen amerlongtsü amshidi. Iba jagi asen dang ajangzüksüba masü, meteta aser memeteti nisung aika nem asenoki teyari agütsütettsü.

## OLEMSABANG

### AOER JUNGLIR KIDONG TARENSEN

~ Jamir kidong senso T.N.Temjen Jamir, Mokokchung

Asen aoer junglir kidong/shilu sobaliba aser kulemkija, libaliro, putipuyang, tatalokba otsutem obou, otsula nungeri jembia aruba aser par chirnur, semchir semnur danga otsu dang shia arunung shitak aser ochi ta dang angazuka aruogo.

Parnok mapang nung mapa tajunga/tamajunga inyaker-a alitsu, saka tanu putu nung parnok inyaksaba mapatembo asenoki mejembir. Meimchir rongnung kar sangrasangchi, shisakartemi teindang otsutem to melenshir/kiraksar chirnurtem dang mesura lokti senden nung ashidang mesura jembidang nutsung nubur mangmangkora/makmakshishi adoktsur aser ochi O shitakba otsu to mashikoshi ka akumer aser lanurtem koba shitak koba meshitak terata, tetsukdak tulu nung nokdaka lir. Anungji Aoer junglir kidong/shilu, tarensen tamajungba makumdang otsu kakat ka lanu asensor atema zulua yutsutsu junglir kidong/shilu tem dang shidanger.

Ooooooooo!!! Aoer Junglir wabongtem, sangbangtem, Elangtsur, kongro tajungtem, otsü- obou-i ashi ama, longtrok nungi tebur asem (3) aser tetsur asem (3) atoker yamai liasu.

1. Mezung Tongbok tebur aser tenu tetsur Longkapokla atoka Pongen kidong aja/akum.
2. Tanabuba nung Longpok tebur aser tenu tetsur Yongmenyala atoka Longkumer kidong aja/akum.
3. Tasembuba nung Longjakrep tebur aser tenu tetsur Elongshi atoka Jamir kidong aja/akum.

Tsürapuri ots? ashiba nungto ajak tajung dang ta bilem. Parnok longtrok lima nung alidang shiruru ama aliba ots? ashidang kanga dang masungtet, jabojarialiba amai angateter. Kodang parnok chungliyiimti-e arua ali idangjiang parnok dangar nisunga aliba metetta nuji tera akum.

Chungliyiimti nung meimchir nuji akumba ka ji, pei kidong den kibalembo masutsu temzung ka renem aser adianu kidong den shingai-a kibalembo masutsu ozung yanglu. Shibai iba temzung, ozung raksadir temerenshi tulu liasu. Anungji chungliyiimti nung mezung kibalembo yamai tenzük.

1. Tongpok aser tenu Longkapokla Pongen kidong as?nung, Tongpok-i Elongshi Jamitsur agi.
2. Longpok aser tenu Yongmenyala Longkumer kidong as?nung Longpok-i Longkapokla Pongentsur agi.
3. Longjakrep aser tenu Elongshi Jamir kidong as?nung, Longjakrep-i Yongmenyala Longkumtsur agi.

Aji oda tanu tashi Ao lima nung junglir kidong/shilu nung, Tongpok Pongen kidong tambu, Longpok Longkumer tanabuba aser Longjakrep Jamir tanubusang ta zungshir/jembir.

1. Tongpok Pongen-i Elongshi Jamitsur agi aser tena chir (1) Yimkum Pongen (2) Medempok Pongen (3) Yimbo Pongen (4) Lisem Pongen (5) Longkongla Pongentsur
2. Longpok Longkumeri Longkapokla Pongentsur agi aser tena chir (1) Mosemsa Longkumer (2) Lemtuba Longkumer (3) Pungiba Longkumer (4) Punem Longkumer
3. Oboula Longjakrep Jamir-i Longmenyala Longkumtsur agi aser tena chir (1) Longpozunba Jamir (2) Chamiti Jamir (3) Naresang Jamir (4) Ayangshi Jamitsur Junglir kidong/shilu asem(3).

1. Obou Tongpok Pongen
2. Obou Longpok Longkumer aser
3. Obou Longjakrep Jamir parnok asoba jala jabasotem kakat nung zulua aliba dang adoktsur. Aji oda tanu ni yangi obou Tongpok Pongen aser obou Longpok Longkumer na otsu tarensen aser soyapokyabatem magutsur saka obou Longjakrep Jamir pa nungi soyapokyaba/jakzukba kar lemsateper.

#### ANGATETTSU ASER TEMETETTSU KAR LEMSATEPER

Ao lima nung Engraji/British yimli 1.4.1880-1941 tashi yimsu asudang P.F.Adams mapang 1.9.1939 asen Ao lima nung junglir/mongsen shilu/kidong puti lipok otsu meteter obou Likokyangba Jamir aser obou Sungkalemba Longkumer (Mes?toba semchir) Putikokba Ungma aser tez?lur Takos?ngba Jamir parnok den P.F.Adams-i asen Aoer sobaliba puti otsu asungdangyatepdang oren karbo meyaktepa mangateti zulur alitsu akok saka Aoer junglir/mongsener anapronglai chungliyiimti nung koma liasu aji metetadang lir. Kidong/shilu anaprongla subosulemba, jayajako, achiajemts?, peipei kidong/shilu teptsu, kechisarena bentetbenteta kecha tashishitsu, song mekuti lia aruba Aoer jungle, mongsener ajungai meteter alitsu ta yimlar. Obou Longjakrep Jamir pa nungi jakzukba chirnur, semchirtem Ao lima yim kwika nung lir aser Ao lima atena oer kar lira (Naga lima nung) obou Longjakrep Jamir, tebu tarensen jakzukdak shitakba nung nai shitetra kanga dang pelatsu.

1. Longpozunba Jamir chir Yimsenpirong Jamir liasu
2. Chamiti Jamir chir Tzudiyong Jamir liasu
3. Naresang Jamir chir Yangkangnungba Jamir liasu

\* Yimsenpirong Jamir chir yamai liasu-

1. Salong Jamir
2. Anungdangsang Jamir
3. Mosem Jamir
4. Yongsen Jamir
5. Machapirong Jamir
6. Milong Jamir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

July-Dec nung Pakistan nung Khristan anema inyakba ken o 38 liasü



Pakistan nunger Khristantemi Geneva nung aliba United Nations office kima Pakistan nung Tsüngrem mezüngmeshiba ozüngtem agienang ta takhangba agütsüba noksa nung angur.

**Washington, D.C February 21 (Agencies):** 2020 küm July 1 nungi tenzüka December 31, 2020 tashi nung (ita trok) Pakistan nung Khristantem anema inyakba tatalokba ken o 38 liasü, ta International Christian Concern (ICC) osang ajanga metetdaksü.

Khristantem anema inyakba tatalokbatem rongnung tashiyim amshia tetsür raksatsüba, kangshia Muslim yimsü dangi meyipdaksüba, kangshia Muslim nunger den kibong kümdaksüba, Tsüngrem mezüngmeshiogo ta tai tonglochtsüba aser Khristantem tepsetba densema lir.

Kasa mapang nungji Pakistan nung Khristantemi Tsüngrem mezüngmeshiogo ta tai tonglochtsüba ken o 6 liasü.

Tsüngrem mezüngmeshiogo ta tai tonglochtsüba Khristantem rongnung Pakistan Spring Factory nung inyaker Khristan, Arshad Masih bo kasa factory nung inyaker Muslim nunger Atif Ali-i kotari amshia tsüngseta liasü.

Masih tsüngsetba sülen Ali-i, pai mamanger ka aser Tsüngrem mezüngmeshir ka tepset, ta ashi. Arshad Masih kinüngtsü, Samina Bibi-i ashiba agi, la kinüngbu mapa nung promotion anguba aser pai Muslim yimsü agizüktsü memelungba agi Ali-i pa tepset, ta ashi.

August 30, 2020 nüa police-i Risalpure nungi Khristan,

David Masih-i kilentzü aodak Muslim nunger temeshi kaket (Quran) indok, ta tai tonglokba pua liasü.

First Information Report (FIR) nung shia aliba agi, Risalpure nung alirtemi kilentzü aodak Quran kaket tapak kar anguba sülen August 27 nü iba video ji social media nung prokshia liasü. Iba ken o nung police-i David Masih apu. Masih-i Pakistan Penal Code kübok Arrla 295-B alema inyakogo ta pa nem tai tonglochtsü.

November 23, 2020 nü Lahore nung Khristan sanitary workers nisung pezüi Tsüngrem mezüngmeshiogo tai tonglokja liasü. Muslim nunger putir kati Khristantem jagi jana bendenba yanghu nung Prophet's Mosque noksa inoker liasü ta tai tonglochtsü.

2020 küm October ita nung Lahore High Court-i Tsüngrem mezüngmeshiba ken o ka angadangba mapang Khristan, Sawan Masih anema tai kuli mengui chioka liasü. Sawan'er medemer Muslim nunger, Muhammad Shahid-i, 2013 küm Sawan-i ainkar Muhammad mezüngmeshia jembiogo, ta tai tonglokja liasü.

2010 küm Tsüngrem mezüngmeshiba ken o nung Khristan, Imran Masih taküm piyong tepuokdak ayutsü obendang agüja liasü, ajisüaka 2020 küm December ita nung pa anema kuli mengui chiok. Pa nem tai tonglochtsüba sülen pa

küm 10 tashi tepuokdak yua liasü.

Pakistan nung Khristan densema tamangba lokti kar anema inyaksü nükjidong nung Tsüngrem mezüngmeshiogo ta tai tonglochtsür. Item ozüng kübok nisung jashitsüsa tai tonglochtsüba ajanga loktii nisung tepseter aser mepetmesü tulu adoker.

1987 küm Pakistan linüki Tsüngrem mezüngmeshiba ozüng rongnung Arrla 295-B aser 295-C inoksemba sülen item ozüng kübok tai tonglochtsüba kanga bulua kümogo.

Pakistan nung Khristan nütsüng shilem 1.6 dang lir saka item ozüng kübok Khristantem nem tai tonglochtsüba ken obo 238 lir.

Tsüngrem mezüngmeshiba ozüng kübok tang Pakistan nung Khristan 25 tepuokdak lir.

July nungi December tsüngda Pakistan nung Khristantem tashiyim amshia raksatsüba, kangshia Islam yimsü dangi meyipdaksüba, kangshia Muslim nunger den kibong kümdaksüba tatalokba aika liasü. Ita trok tsüngdaji Khristan tsür tenet apu aser kangshia Muslim nunger den kibong kümdaksüba sülem Islam yimsü dangi meyipdaksü.

Tang alima nung Khristantem tamajungba reshikangshiba linüktem rongnung Pakistan linük ya jenjang 5buba nung lir (Open Doors USA World Watch List).

Burkina Faso nung putir, Sanon tasü mang angu

**February 21, 2021:** Burkina Faso nung Khristan putir, Rodrigue Sanon, Jihadist teloki puer aoba sülen pa tasü mang Southwest Burkina Faso nung nguogo, ta osang ka ajanga metetdaksü.

Putir Sanon ya Notre Dame de Soubaganyedougou nung teinyakdak liasü, aser pai tongti putir ajurua senden amentsü atema Banfora-i aoba mapang nung kiralongrartemi pa puer ao.

Tesüiba küm pongu tsüngda Burkina Faso nung Islamic kiralongrartemi Khristantem anema inyakba ajanga nisung million 1 dak tema jenshiogo. Iba

linük nung Khristantemi Jihadist kiralongrartem tsübuba agi pei ki aser Arogotem toktsür ajener.

UN Refugee Agency-ia, alima nung meimchir atema kanga keraa tesem tamajungtiba akümba linükji Burkina Faso lir, ta metetdaksüogo.

Persecution watchdog-Open Doors-i, item rara ajanga Khristantem dang masü tangara kongshir, ajisüaka Khristantem dak taliba tenok yoka inyakba ajanga Internally Displaced Camps (IDPs) nung alirtem nem rongdak teyari agütsür, ta

metetdaksü.

Linük nung pastor kati, Burkina Faso north eastern triangle nungbo yimjak nung Arogo kata mali, ta ashi.

"Khristantem refugee camps balala nung jenoka lir, mesüra mepetmesü maliba yimtitem- Kaya, Kongoussi, Sapouy, Djibo, Ye mesüra Ouagadougou nung jenoka lir," ta Pastor Karim-i ashi.

Burkina Faso nung küm aika tamangba yimsü balala amangertem tesünep nung külemi lia aruogo saka tangbo Islamic telungpuri nüburtem tsüngda telemsa adokdaksüogo.

ANO GO ABEN TSÜNGREM DEN

Kechi agi tembar tajungtiba yanglur?  
T. Ken 119: 57-64

Nenoki Ni melaba ozüng beshira nenok kü tembartem lir. Yohan 15:14

Koba tali tesüngmangtsü- Yisui asen tembar asütsü jangraba mesüra Pai asenok Pa tembar sünüba? Asenoki akatsübaji akokbaji Yisui tajungtiba tembar yanglur.

Kechi agi tembar tajungtiba yanglur? Jonathan aser Dawid shisadangang (1 Sam. 18-23). Alimai parnok tembarsübaji tajungtiba ta agizüker. Tembar ka o nung aser mapa nung nangzükteper ta parnoki sayur (1 Sam. 18:4). Tajungtiba tembar kaji tsüngchir, kechisarena tembar asoshi jembir (1 Sam. 23:17) aser Pai pa ama Dawid meim (1 Sam. 18:3).

Bendanga agütsüba, tsüngchir, tamang katetba temeim- tajungtiba tembar temaitsü. Yisui aginüba tembarji iba ama tembar aginür. O dang nungi tali bendanga agütsüba tembar aginür. Tembar shibai tsüngchir süa pa indang jembir iba tembar dang pelar. Shirnok ochi aser tamang katetba lir Yisui iba ama tembar aginür. Shirnoki parnok ama Yisui meimer Pai parnok pa tembar süner.

Yisui tsüngdang na kechi koma tembar? Ne tsüngdang Pa ne tembar tajungtiba asü? Asenoki Pa tembar mekümtettaka, Pai asenok nem tatok agütsür aser bendanga agütsür asenok tsüngdang tsüngchir süa alir. Asenok teti taküm alitsü asoshi Pa tasü tonga tamang katetta alir aser meimer.

"Tesüngmangtsü tembar Yisui, asenok kar."  
Yisui, Na kü tembar tajungtiba. Ne meyong ama alitsü kü dang yariang. Amen.

Eritrea sepaitemi Tenla ki ka kima Tigray nunger jenti tepset

**February 21, 2021:** Tang Tigray region nung Ethiopia aser Eritrea sorkar nati sepa ajanga tashiyim mapa inyakba mapang nung Tigray nunger nisung 800 dak tema tepsetogo. Tigray kübok Axum yimti nung aliba St. Mary Arogo Tenla ki kima nungi nisung noklang aika tepset.

Osangbener den jembidang iba Arogo nung deacon kati, tashiyim amshia tetsürtem taküm raksatsür aser asalentong yanglu nisung jenti tepseter, ta metetdaksü.

University lecturer, Getu Mak-ia, "Eritrea aser Ethiopia sepaitemi Tenla ki nungi ki tsüngda aser ki o ki na tsüngda senzüsempongertem tepseter. Tesem ajaklen tasü mang angur aser kibong shia nung nisungtem ajeper," ta metetdaksü.

Osang angazükba agi, anogo aika tasü mangtem magienba agi Axum yimti nung


teshinem kanga menemer, kechiyong Eritrea sorkari tasü mangtemji ali nung aremtsü memelar.

Yimtitem nung arem nungi tzünü adoka tasü mangtemji achir.

1970s aser 80s mapang nung Tigray nunger leniba nung Ethiopia nung Marxist dictator anema rara-a liasü iba sülen tashi tali amshia yimsüsüba yimliji 1991 küm lao; iba sülenbo Tigray nungeri küm 30 tashi yimsüsa liasü. Ajisüaka 2018 küm Ethiopia nung Abiy Ahmed Ato kilonser akümba sülen pai Tigray nunger lenirtem ajak züngdoka liasü. November 2020 nung telok ana mangatettep adoka Abiy-i Tigray anema apusoa ita aika raraan liasü.

Tigray nungeri Ethiopia anema raraba dang masü saka Eritrea aser Somalia natia Ethiopia pusema Tigray nunger den rarar.

## OLONG PAITEP # 5732



## TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S \_ \_ \_ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

## LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

## OLONG PAITEP # 5731 TELANGZÜBA

## TIPIEN :

2. Bangsemo, 6. Tiptem, 8. Jen,
9. Talila, 11. Aren, 12. Tzübo, 14. Alia,
16. Angati, 17. Odi, 18. Azü,
19. Sünglang.

## LANGTSÜNGLEN :

1. Yipten, 3. Nüja, 4. Sangro, 5. Milen,
7. Tulu, 10. Laza, 11. Aben, 12. Tiyong,
13. Ajizük, 14. Aitsü, 15. Tasa, 16. Aina.



## ALOKBAR CLASS NUNG :

**Missla** : Tanübo mental ongkho kar asüngdangdino, tamasa Alokba langzüang - Nü ket nung chocolate terana aliba nai Narola nem asem, Amenla nem asem, aser Lilila nem asem ta sa lema agütsü nung na kechi anünger?

**Alokba** : Miss, aji chocolate küla karbo anüngjako, saka girlfriend bo tasen asem angur atii.

**Missla** : Shut up Oh Alokba!

Lilir : WhatsApp

## TANÜBO NAI LANGZÜANG

Q. NASA ajanga koba küm Curiosity mission tenzük?

A.1997

B.2003

C.2012

D.2020

===== (Taruba adok nung onoki langzütsü)

YASHI ADOK TELANGZÜBA : February 27 to March 2, 2021

## Happy Birthday

TASOBA - 22TH FEBRUARY

Talidak - Tulikong Ward, 17th Mile Tuli  
School - Don Bosco School, Tuli  
Küm - 9 Class - 4

HAPPY BIRTHDAY!! Akumba!!

Tanü na asoba anogo nung Tsüngrem temoatsü tulu ajanga arishi kum 9 tashi moatsüba yong asen Teyanglur Tsüngrem tenüng asanger. Ano maneni na anema aliba den külemi arishi langa taküm peyong moajangma.


Temiem- Ayi, Aba Tali, Aba chuba, Ati Kilem



## NAI-A YA METETTER MA?

## 1968 NUNGI 2021\* TASHI AUSTRALIAN OPEN WOMEN'S SINGLES TITLE TIMTIBA KOKER ALIRTEM:

- \* Serena Williams 7
- \* Steffi Graf 4
- \* Margaret Court 4
- \* Monica Seles 4
- \* Evonne Goolagong Cawley 4
- \* Martina Hingis 3
- \* Martina Navratilova 3
- \* Chris Evert 2
- \* Hana Mandlikova 2
- \* Jennifer Capriati 2
- \* Victoria Azarenka 2
- \* Naomi Osaka 2



## SUDOKU # 5774

## TELANGZUBA # 5773

|   |   |   |   |   |   |   |   |   |   |   |   |   |   |   |   |   |   |
|---|---|---|---|---|---|---|---|---|---|---|---|---|---|---|---|---|---|
| 7 |   | 4 | 2 | 1 |   |   | 3 |   | 4 | 2 | 3 | 5 | 7 | 8 | 1 | 6 | 9 |
| 2 |   | 3 |   |   | 5 |   | 1 | 4 | 8 | 9 | 7 | 2 | 1 | 6 | 4 | 5 | 3 |
| 6 | 1 | 5 | 3 | 8 |   |   | 7 |   | 5 | 6 | 1 | 9 | 3 | 4 | 8 | 7 | 2 |
| 8 |   | 1 | 7 |   | 6 |   | 4 | 9 | 6 | 3 | 8 | 7 | 4 | 5 | 9 | 2 | 1 |
|   |   | 6 | 1 |   |   | 5 |   |   | 7 | 4 | 5 | 1 | 2 | 9 | 3 | 8 | 6 |
|   | 4 |   |   | 9 | 3 | 2 |   | 1 | 2 | 1 | 9 | 6 | 8 | 3 | 5 | 4 | 7 |
| 4 |   |   | 9 |   | 7 |   | 5 |   | 1 | 8 | 4 | 3 | 6 | 7 | 2 | 9 | 5 |
|   |   | 2 |   |   | 1 | 4 | 9 |   | 9 | 7 | 2 | 8 | 5 | 1 | 6 | 3 | 4 |
|   | 5 |   |   |   | 8 |   |   |   | 3 | 5 | 6 | 4 | 9 | 2 | 7 | 1 | 8 |

## OJANG LUTEP # 5320

- ETBRATETA :
- UNTAJG :
- BAALI :
- GIJA :
- NMANLEG :
- ISAÜ :
- UNNG :
- ENOASK :
- GITNUNA :
- IRYAR :

## OJANG LUTEP TELANGZÜBA # 5319

TANGAR TIMTEM ALIDANG MEYARINÜ PEI  
TIMTEMA ALIDANG TANGAR TEYARI AGINÜ

## TAN HOPTA ATEMA - KOMA SÜLA ?

Q. Ao oshi renloktsü atema Aor kibongtem nung teyaritepertem tangar kin nungi masü Aotsür Aortem dang ayu nunga koma süla?

Olong 20 shi nung February 26, 2021 tashi nung iba telangzüba ya onok dangi (e-mail - tiryimiyim@gmail.com) :  
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



Barnala, February 21, 2021: Amongnü Barnala nung aluyimertemi aluyimba ozüing tasen asem anema lokti senden aliba mapang nung New Grain Market nung aluyimertemi senzüsempongertem dang tanga lenmang ajanga senzüang, ta mepishiba noksa nung angur.

## US nung aluyimer union 87-i India nunger aluyimertem pusemer

**New Delhi, February 21 (Agencies):** US nung Ronald Reagan Tir inyakba mapang (1981-1989) nung sorkar mapatong balala ajanga US nung aluyimertem kanga takoksa ngudaktsüba aser aluyimba sector mejungi raksatsüba atishia US nung aluyimertem unions 87-i tang India nung aluyimertemi longkak aitba pusema jembiogo.

US nung aluyimertem unions 87-i shidi ka ajanga US aser India naprongla nung market dak sendakba mapatongtem ajanga aluyimbaren nung mejungi kongshir, ta metetdaksü.

US nung aluyimertem unions-i shidi tetenzüklen, Ghazipur (India) nung longkak aiter aluyimer, Ringhu Yaspal-i jembiba o ka lepschia, "Aluyimba ya miim ka kümogo. Yangi rara-a asüba tajungba asütsü," ta metetdaksü.

Unions-isa, "Tang Delhi arrtsülen longkak aitba ya alima puti otsü nung longkak aitba tashi taitibatem rongnung ka lir," ta metetdaksü.

"Tim masüba aluyimba ozüing asem agienang ta parnoki akhanger; item ozüingji parnok den masüngdangtepi benoka liasü. Tesünep nung aluyimer meyrjang aikati parnok temeden aser akhümket atema tasü itta longkak aibaji alima tesem balala nung aluyimertem den külemi onokia pusemer," ta parnokisa metetdaksü.

India nung aluyimertemi

akhangba tongti onük rongnung Minimum Support Price (MSP) densema lir. Tang sorkari aluyimertem nem aonsotsü kar nung dang MSP agütsür, ajisüaka tang nungibo alu nungi züsentetba aonsotsü ajak nung MSP agüjang ta aluyimertemi akhanger.

US nungi aluyimertem unions-isa, MSP ya tanga shishilembartem atema-a jenjang latettsüba tongtibang onük ka lir, ibaji ajanga aluyimertemi parnoki züsentetba chiyungtsü jenjang shidak agi yoktetsü, ta metetdaksü.

"India-i MSP agütsüba atema World Trade Organization (WTO) nung India anema jembir tongti rongnung US densema lir. US den Australia, Canada aser European linüktemi India nunger MSP ajanga shishilembaba raksatsür ta aitsür," ta parnokisa metetdaksü.

Parnoki Joe Biden administration danga aluyimertem ajungtsüsa aluyimba asalentongtem yanglutsü mepishia metetdaksü.

US farmers unions-isa, tang India nunger aluyimertemi ajangshiba ya küm 40 tejaklen US nung aluyimertemibo ajangshir liasü, ta ashi.

"Reagan (taoba US Tir) yimsüsüba mapang nung aluyimba asalentongtem ajanga aluyimba sector ano tamajungba aküm," ta parnoki metetdaksü.

Unions-i "US aser India

sorkartem dang aluyimertem nungittsü mepishir. Samyukt Kisan Morcha nungi aluyimertemi nokdakbaji onoki pusemer," ta metetdaksü.

India nunger aluyimertemi longkak aitba pusema US nung Farmers Union 87 rongnung A Growing Culture, Abanitu Organics, AFGE Local 3354, Agri-Cultura Cooperative Network, Agricultural Justice Project, Agroecology Commons, Agroecology Research-Action Collective, Alabama State Association of Cooperatives, American Sustainable Business Council, Americana World Community Center, Association for Farmers Rights Defense, Black Farmers & Ranchers New Mexico/ National Latino Farmers and Ranchers Trade Association, Center for Regional Agriculture Food and Transformation, Community Agroecology Network, Community Alliance with Family Farmers, Community Food and Justice Coalition, East Michigan Environmental Action Council/ Cass Commons, Family Farm Action Alliance, Family Farm Defenders, Farm and Ranch Freedom Alliance, Farmworker Association of Florida, Institute for Agriculture and Trade Policy, Institute for Earthbound Studies, National Latino Farmers & Ranchers Trade Association aser United People Community Organization, Market & Farms densema lir.

## Covid tali prokba states nung RT-PCR test timba agitsüla: Centre

**New Delhi, Tsüklai/February 21 (Agencies):** India kübok state kar nung coronavirus tashidak ano tali prokba sülen Amongnü Centre sorkari item state tem dang surveillance aser RT-PCR test taliba agitsü tuyuogo.

Tesüiba anogo ishika tsüngda ano coroonavirus kanga bulua prokdar aser Amongnü tashi nung linük nung iba tashidak agi teshirangdakpur 1,45,634 kümogo.

States aser UTs pongu nungbo iba tashidak agi shirangertem national average dang nungia timba kümogo.

Ministry of Health & Family

Welfare (MoHFW)-i ashiba agi, tang linük nung coronavirus tashidak agi teshirangdakpur shilem 74 bo Kerala aser Maharashtra state na nung lir.

"Tawa Chhattisgarh aser Madhya Pradesh na nunga iba tashidak kanga prokdar. Punjab aser Jammu & Kashmir nunga anogo shia iba tashidak timba puteter," ta Ministry of Health & Family Welfare-isa metetdaksü.

Centre soakri item states aser UTs dang RT-PCR tests timba agitsü tuyuba den külemi iba tashidak tali prokba district tem nung wara nokdangtsü atema inyaktsü tuyu.

## Sorkari social media dak sendakba ozüing ka yangludar: Ram Madhav



**Kolkata, February 21 (Agencies):** BJP lenir, Ram Madhav-i, sorkar-a atsüngdoktsüsa social media dak tashi tulu lir, social media ajanga rara adokdaksür aser democracy tashi meitdaksür, anungji item tebilemtsü bentettsü atema inyaktsü nüngdak, ta metetdaksü.

Pai züluba kaket 'Because India Comes First' sayaba sentong nung jembidang Madhav-i, democracy tashi meiti kümдар aser yimtenren nung malirtem aser bendangertem ajanga tayongzükba balala ajurur, ta metetdaksü.

Honibar aonung Prabha Khaitan Foundation-i Kolkata nung ayongzükba sentong nung jembidang pai, "Sorkar-a atsüngdoktsüsa social media ya kanga tashi tulu aliba sabang ka kümogo, aser ibaji azüoktsü tasak kechiyong iba sabang nung arrtsü mali," ta metetdaksü.

"Item tebilemtsü azüoktsü atema temzüng-ozüing tasen nüngdak. Iba atemaji sorkari inyakdar," ta BJP lenirisa metetdaksü.

Information Technology Minister, Ravi Shankar Prasad indang accounts shibangtsüba dak sendakba nung India sorkar aser Twitter na tsüngda mangatetep adoka aliba mapang ka nung Madhav-i iba o ya jembiogo.

India-i Twitter dang India nunger ozüing benshitsü metetdakja liasü.

Iba dak alia temepishiba ken

o ka agütsüba nung ajemdaker Supreme Court-ia Centre sorkar aser Twitter nem notice ka agütsüogo.

Madhav-i ashiba agi, pai züluba kaket 'Because India Comes First' nung pai Modi-i aniba sorkari agiba telemtetba balala dak sendakba osettem zülua lir.

Mahatma Gandhi dak sendakba tasüngdangba ka langzüdang Madhav-i, RSS-i linük nung lenir balalai inyaktetba mapatem mesensatsür; Gandhi ya lenir tajung ka liasü aser pa tesayubatemji alima nung lenir aikati benshir, ta ashi.

"Tangatetba balala alitsü akok, Nehru aser Gandhi na tsüngda zülutepba shiditem nunga tangatetba balala lir, ajisüaka onoki linük lenir ka akhüm metsübur ta mangatetdaksüner. Anepdang RSS sarasadem nunga onoki lenirtem rongnung Gandhi tenüing-a tetshir," ta pai ashi.

Kashmir onük nung pai, Arlla 370 agienba ajanga grassroot lenirtemia kibong kari ambangyima inyakba anema nokdaker, ta ashi.

Kashmir nungertemi parnok-a nütsüing billion 1.3 aliba kibong nung densema lir ta bilemtsüsa linük nüburtemi inyaktsüla, ta pai ashi.

"Olulu ajanga Kashmiri nunger mapang talangka akoksaogo. Temelenshi adokdar, ajisüaka ano mapang tatsüka agitsüa akok," ta paisa shisem.



February 21, 2021 nü New Delhi nung aliba Jawaharlal Nehru Stadium nung 26buba 'Hunar Haat' tenzükba sülen Defence Minister, Rajnath Singh aser Minority Affairs Minister, Mukhtar Abbas Naqvi nati stalls semdanga senzüdang tangokba noksa nung angur.

# Myanmar: Mandalay yimti nung longkak aiter ana tepset

**Mandalay, Tsüklai/February 21 (Agencies):** Myanmar kübok Mandalay yimti nung Honibarnü longkak aitertem senshidaktsütsü atema police temi injang akhaba mapang nisung ana tepsetogo, ta emergency workers temi ashi.

"Nisung metsü dak tema yiruogo aser nisung anabo süadokogo," ta yimti nung Parahita Darhi volunteer emergency service agency lenir Ko Aung-i ashi.

Myanmar kübok yimtitem nung lokti nung nütsüg agi ajema aliba lisopurtem, sangro mejemertem, transport nung inyakertem densema nisung meyirejang aikati military yimsüsüba anentsü aser pua aliba lenir Aung San Suu Kyi aser tanga lenirtem chioktsü

khang longkak aita liasü. Longkak aitertem kari Mandalay nung police tem dak rubber lijak agi akha aser meyiper police temi parnok dak tear gas aser injang khalokja liasü. Ajisüaka sepaitemi rubber agi yangluba injang amshi asü aji mejangjai liasü

Longkak aiter rongnung ka tekolak yirur asü aser yimti nung Voice of Myanmar media outlet assistant editor Lin Khaing dena süogo, ta Mandalay emergency service sangdong ajanga metetdaktsü.

Volunteer doctor kati ashiba agi nisung ana süadokogo: "Nisung ka tekolak nung khar iba tesem nung süadok aser ano nisung ka teku nung injang agi khar mapang tatsüka lir asü," ta paisa ashi. Iba ken o dak

sendakba nung police temi osang kecha magütsü.

Suu Kyi-i aniba party-i kümtetba sorkar atsüngtokba anema nüburtemi longkak aita arudar aser tang tashi nung tashi ajema aoba temaitsü kecha mesayur. Army-i election agishia takoker nem tashi agütsütsü nangzükba longkak aitertemi mamanger.

Hokolbarnü longkak aiter rongnung aiür ka süogo. La taoba hopta linük yimtiba Naypyitaw nung police temi lokti senshidaktsütsü atema injang akhaba mapang tekolak yiru aser mapang tatsüka temang anepaluyar asü. Military-i sorkar atsüngtokba anema longkak aiter rongnung la mezüngbuba asü.

Kasa mapang nung army-i ashiba agi, longkak aitba

sentong ka nung yiruba sülen police-a ka süogo.

Honibarnü Yangon yimti nung lanur longkak aitertemi naro bener oa Mya Thwate Thwate Khaing indang leper nung toktsüogo aser kasaji Naypyitaw yimti nunga sentong ka agia liasü.

"La asüba atema tejashi balaka saka la tenüng nung onoka maneni nokdaktsü atema tali tasü taitba akümer," ta longkak aiter rongnung kaketshir Khin Maw Maw Oo-i Naypyitaw yimti nung ashi.

Longkak aitertemi election ajanga shimba sorkar tanaben amenokshitsü aser lenir Suu Kyi-i anir tanga lenirtem chioktsü aser 2008 küm military-i achaayaga yangluba constitution koba ajanga yimden yimsüsüba nung army nem tongtibang shilem agütsür, iba constitution agintsü akhanger.

Taoba küm November 8 nü agiba election nung ochi mashi inyakim densema lir ta shia army-i sorkar atsüngtok aser National League for

Democracy lenir Suu Kyi aser tanga lenirtem sota ayu. Electoral commission-ia election inyakim nung ochi mashi inyakim kecha mali ta shiatokogo.

Natural Disaster Management Law nung aibelenba aser walkie-talkie radios trok özüing alema bener aruba atema Suu Kyi aija lir. La March 1 nü okadak nokdaktsü.

Longkak aiter ana tepsetba osang angazüka UN-i Deobarnü linük nung military yimsüsüba tali aitsüogo.

United Nations Secretary General Antonio Guterres-i, tashiyim amshia longkak aitertem azüoktsü merangba aitsüogo.

"Yimjung nung longkak aitertem anema tashiyim amshiba ya agizüktsü makok," ta Guterres-i ashi.

Facebook nung prokshiba video ka nung lanur ka tekola nungi azü yima mepitaker pa anasa nisung kati pa dak teku nung tangola sashiba tendangtsü atema nemeter aliba sayuogo.

## Australian PM nungi tenzüka nüburtem nem coronavirus mozü agütsür

**Melbourne, Tsüklai/February 21 (Agencies):** Tain hopta Australia nung coronavirus mozü agütsü tenzüktsü renemshiba mapang Ato Kilonser Scott Morrison iba mozü agiogo.

Australia tesem ajunga nung iba mozü agütsüba mapang nüburtem temolung uludaktsütsü mechi Deobarnü pa iba mozü agiba ya television nung sayua liasü.

Mozü agütsüba maparen ya Hombarnü tenzüktsü aser taruba hopta tashinung tajemba agi nisung 60,000 tashi nem iba mozü agütsütsü nükjidong lir.

Honibarnü iba mozü anemer telok tilaka adenshia longkak aita liasü.

Deobarnü nisung kar nem mozü agütsüba rongnung Morrison ya dena liasü aser ano frontline health worker aser care home resident karnem agütsü. Australia indang chief nurse Professor Alison McMillan aser Chief Medical Officer Professor

Paul Kelly na nema mozü ya agütsüogo.

Mozü agitsü lia jembiba mapang, "Asüng asen vaccination sentong tenzüktsü, anungji iba sentong tenzüktsür ama tanü tongtipang temaitsü kar sayur; ibai timtem mali, ibai tongtipang aser asenoki iba mozü agiba maparen ya tashidak menatsü tezüpaba jenjang nung alirtem aser front line nung alirtem nungi tenzüktsüla," ta Morrison-i ashi.

Iba linük nung coronavirus mozü agir mezüngbuba ya arishi küm 85 tain Jane Malaysiak liasü.

Australia nung Pfizer mozü ya mezüng amshitü atema temelaba agütsüogo.

Australia indang medical regulator temisa AstraZeneca aser Oxford University nati yangluba mozü amshitsü mela, koba taruba ita nungi agütsü tenzüktsü. Health Minister Greg Hunt-ia pa tain hopta AstraZeneca mozü agitsü, ta shiogo.

Mozü anaprong ya kanga junga tendangogo aser linük aika nung amshi tenzükogo.

Australia nung March ita tetenzüklen tashinung nisung million pezü nem COVID-19 mozü agütsütsü sentong lir.

Mezüng round nung health sector, arrtsü anüker, care homes den care home nung alirtem frontline worker 700,000 nem iba mozü ya agütsütsü.

Iba sülen Australia nunger arishi küm 70 tema, Aboriginal aser Torres Strait Island nung alir arishi küm 55 tema, healthcare worker, shiranga aliba lanurtem aser emergency service nung inyaker nem agütsütsü.

Iba mozü agütsütsü atema sentong yangluba anema Melbourne, Sydney aser Brisbane yimtitem nung Honibarnü longkak aita liasü.

Australia nung coronavirus tashidak wara tenzüker tang tashinung nisung 28,920 menepogo aser nisung 909 süogo.

## Niger nung tir election agir

**Niamey, Tsüklai/February 21 (Agencies):** Niger nung Deobarnü nungi tezüka tir atema vote tanabuba round agütsür, aser iba ya ajanga 1960 küm France nungi nüjiso anguba sülen iba West Africa linük nung yimtenren democracy dangi melentsü teimla lir.

Tang yimsü tesüdak telok nungi Mohamed Bazoum yagi takok angutsü amai nisung aikati bilemer, kechiaser December 27 nü mezüng round vote agütsüba mapang pai vote shilem 39.3 nguteta liasü. Pa ya taoba tir Mahamane Ousmane den tokteper, shibai vote shilem 17 nguteta lir.

Arishi küm 61 tain Bazoum ya tang teinyakdak Tir Mahamadou Issoufou indang sorkar nung foreign aser interior ministry densema temaba jenjang aika nung inyaka arua lir, shiba mezüng round vote agütsüba mapang jenjang asembuba aser pezübuba ngutetba candidate temi nungiter.

Bazoum-i Issoufou sentongtem maneni inyaktsü nangzük, linük nung telungpur tebilemtsü agi sünga lir asünung security nung temolung agütsütsü aser rongsenketsüing ajungkettsü asoshi sentongtem yanglutsü nungdaker.

Arishi küm 71 tain Ousmane ya Niger nung democracy yimya amshia shimba tir mezüngbuba lir aser pa ya 1996 küm mitkar tashi amshia sorkar nungi atsüngdoka liasü. Party tila ter

dak tema aser mezüng vote agütsüba mapang tokteper candidate temi pa yarir. Pai temelenshi bener arutsü aser ochimashi inyakim samatsütsü nangzüka lir.

Mezüngbuba vote ya linük yimtiba, Niamey nung anepdang 8:30 ako nung agüja liasü.

Nütsüng yongsük million 24 shi aliban Sahel linük ya alima nung tesensaktiba linük tem rongnung ka lir aser yangi mapang shia tzüingsarusa aser tzümetsüing lendong agi timtem agütsür. Maneni coronavirus wara ajanga rongsenketsüing nung tetsükdaktsü agütsüba den iba linük nungi bendanger dang ayokba uranium jenjang ajema akumba mechi revenue nunga kongshi.

Vote mezüng round agütsüba mapang vote agütsür shilem 70 liasü, anungji tanü vote agütsürtem iba dang timba alitsü, ta Niamey nung amenoka alir political analyst Elhadj Idi Abou-i ashi.

Niger nung telungpur tebilemtsü tulu ana lir, ka anüolen tsütsü Mali aser Burkina Faso den arrtsülen, kong al Qaeda aser Islamic State den sendaktepa aliba telungpur temi lendong balala agütsür. Mali den arrtsü anasa January ita yimtsüing ana amakba mapang nisung 100 tepseta liasü.

Southeast tsütsü Nigeria den arrtsülen Boko Haram teloki amakba mapanga nisung noklang aika tepsetogo aser meyririjang aika tesem balala nung jenshia lir.



Manila, Philippines nung makamaiter aliba tesem ka nung February 21, 2021 nü kitsük-kirong lendong atalokba sülen yangji alirtemi pei osettem bushiba noksa nung angur. Manila indang Tondo district nung ghonda trok shi kitsük-kirong lendong atalokba mapang nisung pongu rongset, ta firefighter temi Deobarnü ashi.

# Tetsü oshi anogo nung jayajako seminar agi



**Dimapur, Feb. 21 (TYO) :** Alima Ajunga Tetsü Oshi Anogo February 21, 2021 anogo nung, Unity Village Ao Baptist Arogo (UVABA)-i ayongzüka iba amung den repsema Aor jayajako seminar sentong tajung ka agiogo. Iba sentong nung tesayurji Ao Senden Literature Board (ASLB) tezülur Wb. I. Temjen Tzüdir liasü.

"Asen Aor zülumen asoshi küm 23 tashi raratepa arudang tangar nem ajateta odaktsü. Tang ASLB-i anir Aor tejakleni odi ta apusodang temetet shisanger aser tai apur aika adoker. Asenok lungjemer terenlok tajungtiba ka bener arutsü meranga inyakdi," ta ASLB tezüluri ashi.

Ao arogo osang kakat kar nungbo English agi züluba angur. Tongtibangsa tululu azüngertemi itemji zülur. Ibai asenok asoshi tebilemtsü masü no? ta paisa asüngdanga bilemdangtsü olen ka ashi.

Tetsü oshi nungji telungjem aser temeimtep lir, anungji iba nükmengi bushidi ta Tzüdirisa

sentepa alirtem ayongzüük. Tang tashi nung oshi 573 shi samaogo. Ano oshi 3500 shi samatsüba jenjang nung lir aser aji kecha meteta mali samatsü akok, anungji saksalema lidi ta paisa shisem.

Tang Ao oshi ya shiranga lir, saka shiranga lir ta asenoki memeteter. Kibong nungbo Ao oshi jembitsü saka yimdong nung tanuri tanga oshi jembitsü, ibai oshi ka shirangba mezüngbuba jenjangji lir, süra ner kidanga koda? Kibong nung tsüraburi Ao oshi jembitsü merangtsü saka chirnuri mejembitsü aser tanem tanemi chirnurtemi mangatettsü, ibai tanabuba shirangba jenjangji lir ta ASLB tezülurisa metetdaktsü.

Kibong nung chirnurtemi Ao oshi mejembii kibong akümtsü; parnok chir jagibo Ao oshiji tangateta magatettsü. Yamala kibong nungjibo Ao oshiji südaktsüogo ta metetdi, ta tesayurisa ashi. CYE sentep, Sunday school aser child amala nung Ao oshi mejembira ibaji joko lokti balala nungjia Ao oshi

südaktsütsüba tetenzüker ta angatetdi. Anungji iba jenjangji majurutsü asoshi tang ya saksalema alitsü mapang lir ta paisa ayongzüük.

Iba sentong nungsa tesayuri tetsü oshi shitak angazüktsü aser zülutettsü tasa den, Ao oshi nung meteta alitsü tongtibang ojang aika rateta sayua liasü

Tanü iba sentong nungsa, 'Oshi ya kin ka asoshi ayak lir. Saka pei oshi mashiba ajanga aika yakbangi marur. Anungji asen oshi mesendoktsüla aser tsüraburi anir pei kidang teti Ao o jembitsüla," ta Sovima Ao Senso Telungjem Tir Wb. Imtisangba Aieri ashi.

Iba sentong nung Wt. R. Asangla APW, UVABA-i Feb. 21 anogomung ratet ashi aser Wb. Merentemjen-i tajungshi o jembia liasü.

Iba seminar nung ya UVABA Christian Education Ministry kübok aliba tanur küm 12 ser tema ajak den CEM tesayurtem aser lanurtem ajak dena liasü aser Ao oshi dak sendakba jenti angazük.

## 2021 Honda HR-V model tasenba sayaogo

**Tsüklai/February 21, 2021 (Agencies):** Meimbanga aliba temai adoka aser teaser sayuba sülen, Japan nung Honda indang third-gen HR-V SUV sayaogo.

Vezel ta nüngja agütsüba next-generation HR-V tereprangtsü tajungba den feature tasen aika angutsü. Taoba model dang nungi model tasenba nung temelenshi aika angutsü aser sporty lir, saka mezüng ama hybrid dang alitsü.

HR-V tejaklen bumper den puteptsüsa grille tuluka inoktsüogo. Iba den headlamps tasen aser LED DRLs na feature tasen rongnung dena lir; aser taoba HR-V ama model tasenba nung tesülen kishi handle ya C-pillar nung külemi inoktsü. Tanga Honda model tasen ama HR-V nung tail lamp tasen angutsü, koba LED light bar alitsü.

Gari telung cabin ya 2022 Honda Civic prototype ajanga ajungmesoba design ka lir. Iba nung dashboard den air vent



tuluka dena lir. Gari infotainment system ajunga tasen alitsü, koba tablet ama lir aser taoba model dang nungi tuluba asütsü. Dashboard tiyong nung stylish knob asem inoktsüogo, kong physical controls aser climate control dena lir. HR-V tejenba ama tesülen seat ji split fold-down aser flip-up alitsü.

Honda-i gari indang feature ajungabo memetetdaktsü, ajisüaka gari nung hands-free powered tailgate, panoramic sunroof, 'breeze' AC outlet aser hill descent control dena lir. Iba den külemi, gari nung Honda Connect car tech aser feature talisa Wi-Fi hotspot, digital key den remote ajanga

achaaayangtsüsa feature dena lir.

Japan indang automobile company tetsüti Honda-i gari powertrain indang tejangja kar metetdaktsü, kong gari ya 1.5-litre petrol engine den electric motors ana aketba angutsü. Model tasenba powertrain ya Honda City hybrid ama alitsü imlar.

HR-V model tasenba ya taküm April nungi Japan nung mezüng ayoktsü aser iba sülen linük balala nung ayoktsü sentong lir. India nung Honda indang SUV ka danga mayoker asünung, HR-V model ya sangküm(2022) linük nung sayatsü imlar.

Maneni, India lenmang nung anitettsüsa, HR-V 'underpinnings' ya fifth-gen Honda City ama angutsü imlar. India shishilembadak HR-V yagi premium variant talisa Hyundai Creta, Kia Seltos aser aruya aliba model talisa Skoda Kushaq, Jeep Compass aser Volkswagen Taigun tem den tokteptsü.

### Pelaba Lemsateper

Ni rara tajung ji raraogo. Ni alizung tonga asemogo , ni tamajungji yuogo . “2 Timothy 4:7.



TASOBA :  
3-05-1951

TASÜBA :  
8-02-2021

Onoki kodanga amatoktsü makokba asür **Tzüknungtemshi (Unger)** pa asüba anogo nungi shirnoki sa nübo, rongsen, sarasadem aser shisatsü agi yaritepogo nenok ajak dang kinunger ajaki kangasa pelaba iba osang kakat ajanga lemsateper . Tsüngremi nenok mapa tajung asoshi tali moajangma.

**Temeim, Kinungtsü, Chirnur, Semchir, Kinunger & Anükapang.**



Alima tetsü oshi anogomong nung Ao Senden Literature Board nung züngsem Wb.I.Anungba Sangliri Borlengri Ao Baptist Arogo nung anogomong onük jembiba noksa nung angur. Iba anogomong sentong ya Dimapur aser temeket Ao Baptist Arogotem aika nung kanga junga ayongzüka agiogo. Dimapur, Feb.21, 2021.

## 'Ms Marvel' atema Laurel Marsden aniok



**New York, Tsüklai/February 21, 2021 (Agencies):** Ms Marvel cast rongnung, Quibi indang 'Survive' nung shilem agila Laurel Marsden aniokogo. Kasa project nung Iman Vellani-i Ms Marvel aka Kamala Khan ama shilem agitsü terenemba lir. Iman ya Marvel Studios indang mezüng Pakistani-American teen superhero alitsü.

Osang ajanga angazükba agi, iba series nung Marsden-i Zoe Zimmer ama shilem agitsü.

Otsü nung Zimmer aser Ms Marvel na tsüngda mangatetep liaka, tena ya tembar ama lir aser la (Zimmer) ya Coles Academic High nung ajaki metetba tetsür ka, shiba Hudson River nung Ms Marvel-i la mezüng kümzüker. Kasa mapang, Zimmer-i school indang star athlete Josh Richardson den nüknürateper.

Iba series atema Bisha K Ali-i script zülutsütsü. Ms

Marvel aka Kamala Khan ya New Jersey nungi superhero ka, shiba dak 'shape shifting' aser 'healing factor' ain keta lir

Bad Boys for Life' film yanglur tarep Adil ElArbi aser Bilal Fallah na den anaben Oscar documentary short winner Sharmeen Obaid-Chinoy aser director Meera Menon nati longjemer iba series direct asütsü.

'Ms Marvel', koba 2014 küm Marvel indang mezüng Muslim character ka ama comic book title agütsür adok, iba ya tainlonglong tetsür Kamala Khan taküm otsü alitsü. Iba character ya G Willow Wilson, artiste Adrian Alphona, aser editor Sana Amanat o Stephen Wacker nungeri yanglu.

Iba project nung Saagar Shaikh, Aramis Knight, Matt Lintz, Zenobia Shroff, Mohan Kapur aser Nimra Bucha nungeri shilem agitsü. 'Ms Marvel' ya taküm küm tatemlen sayatsü sentong lir.

## Vijay Hazare Trophy: Nagaland-i Sikkim kokogo



Nagaland team asaya akokba sülen tangokba noksa nung angur.

**Dimapur, Tsüklai/February 21 (TYO):** Tang asayaa aliba Vijay Hazare Asayamung nung February 21 nü Nagaland aser Sikkim na tsüngda asaya liasü. Iba asaya Nagaland team-i run 98 agi kokogo.

Toss akokba sülen Sikkim team-i Nagaland team nem bat asütsü maongka agütsü aser parnoki over 50 nung asayar 8 out ser run 310 yanglua liasü.

Nagaland team nungi asayartem rongnung Sedezhalie Rupreo-i run 99, Jonathan Rongsen-i run 92, Hem Bahadur Chetri-i 44\*,

Joshua Ben Ozukum-i 18, Chetan Bist-ia 18 aser Stuart Binny-i run 16 yanglua liasü.

Sikkim team bowler tem rongnungi Nitesh, Varun Sood aser Rajiv nungeri wicket anana agi aser Anureet Singh-i wicket 1 agia liasü.

Asaya tanabuba shilem nung Sikkim team batting amenba mapang parnoki over 49.2 nung asayar ajak out ser run 212 dang yangluteta liasü.

Sikkim team batsmen tem rongnungi Robin Bist-i run 72, Nilesh Lamichaney-i run 37 aser Anureet Singh-i run 20

yanglua liasü.

Nagaland team bowler tem rongnungi Hem Bahadur Chetri-i wicket 3, Khrievitso Kense-i 2 aser Nagaho, Imliwati aser Hokaito nungeri wicket kaka agi.

Nagaland team taruba asaya Mizoram den February 23 nü 9:00 ako nungi tenzüka asayatsü. Iba asaya indang live score @BCCI.TV nung update sütsütsü, ta Nagaland Cricket Association, Hon. Secretary Hyunilo Anilo Khing-i sangdong ka ajanga metetdaksü.

## Novak Djokovic-i Australian Open kokogo



Australian Open tebur kija asaya final nung Russia nunger asayar Daniil Medvedev akokba sülen Novak Djokovic, Norman Brookes Challenger Cup amer tangokba noksa nung angur.

**Tsüklai/February 21, 2021 (Agencies):** Deobarnü Australian Open tebur kija asaya final nung Novak Djokovic-i, Russia nunger asayar Daniil Medvedev straight sets nung koka Australian Open tekubenbuba kokogo, koba otsü tasen ka asütsü.

Djokovic-i Rod Laver Arena nung Medvedev madak 7-5, 6-2, 6-2 agi takok angu aser Russia nunger asayar ya asaya 20 tashi khien danga tamakok mongui arua aliba tembangtsü.

Australian Open tanabenbuba asemen atonga akokba sülen Djokovic-i Grand Slam title 18buba benogo aser Roger Federer o Rafael Nadal na ana agi dang memenepi lir, shirnoki grand slam metsütsü koka lir.

Asayamung ka asayar kati timtiba akokba nung Federer-i Wimbledon tiben koker aliba Djokovic-i ajatetogo ajisüaka Nadal-i Roland Garros 13 ben koker aliba meneptsü talangka lir.

Taküm iba asayamung final tashi nung Djokovic-i set pongu tashi makok aser pa tepok atsüba ajanga tasembuba round sülen asayamung nungi tuguadoktsü liasü.

Yirur asayaba ajanga temang tamajungba küma season tepeyong timtemtsü akok ta metta liaka pai odang asaya aser asayamung akokba sülen pai telemtetba shidak agiogo ta angateter.

Medvedev ya kanga tesangra asayar ka lir aser pai pa asayaba yimya agi asayartem mangmangdaksür

ajisüaka final asaya nung Serbia nunger asayari pa asayaba yimya lazüka kanga junga asaya.

Mezüngbuba set nung Djokovic-i mezüngbuba Medvedev indang serve break asü saka Medvedev-ia serve ka break asüba sülen tena kanga toktepa asayar Djokovic-i tanabenbuba serve break süa asaya akok.

Iba sülen tanabuba aser tasembuba set anaprongla nung Medvedev nem point angutsü asoshi maongka magütsüi Djokovic-i asaya akok.

Iba asayamung akokba sülen Djokovic-i maneni temaba jenjang nung pa jenjang akangshia yangluogo.

Kasa mapang nung Medvedev-a Nadal sülen jenjang asemubai atutsü.

## IPL auctions nung meshimtsü imlaa maliasü

**Tsüklai/February 21, 2021 (Agencies):** Australia cricket team white-ball captain Aaron Finch-i Deobarnü ashiba agi, tawa Premier League auctions nung pa meshimtsü tabo imlaa maliasü, saka kidang mapang tatsüka intoktsüji mejungrabo masütsü, ta ashi.

IPL 2020 nung Finch Royal Challengers Bangalore nungi asaya aser pai junga masayatet aser run 50 dak tema khien dang yanglua liasü.

Kasa mapang nung pai Big Bash League (BBL) nunga junga masayatet aser Melbourne Renegades nungi asaya 13 nung pai run 179 dang yanglutet.

"Asayatsü asoshi tanaben maongka angu nung jungle, kechiyong iba asayamung nung tasayanütsüka, ajisüaka ni meshimtsü tabo imlaa maliasü," ta Finch-i osangbenertem dang ashi.

IPL atema auction February 18 nü Chennai nung agi aser Australia nunger asayar Glenn Maxwell crore 14.25 aser Jhye Richardson crore 14 agi alizükogo.

"Ni cricket maneni asaya liner, saka kidang mapang tatsüka intoktsüji mejungrabo masütsü, kechiyong taoba küm August ita UK-i aoba nungi tenzüka mazüangi aruogo aser quarantine aser bubbles balala nung asayaa aruogo..."

"Kidangi oa battery recharge asütsüji tajung asütsü. Kü kinungtsü iba mapang atema yongyaa atadar," ta Finch-i ashi.

Australia aser New Zealand na Hagley Oval nung Hombarnü nungi tenzüka T20 asaya pongu asayatsü.

Quarantine mapang Finch-i pa asaya yimya arangtetshia aruogo aser mapang tatsüka junga masayateti arur iba asayamung nungbo junga asayatsü imlaa atadar.

"Ni technical tsütsü tilateri kar melenshitsü meranga arudar aser front foot nung weight tali magütsütsü merangdar. Mapa kar nungbo ni kü tsüng ajunga ajemokadokba ajanga tanaben arakzütsü tasak akümer," ta Finch-i ashi.

## Asian asayamungtem ayongtsü Hong Kong renemer

**Hongkong, Tsüklai/February 21 (Agencies):** Asian Champions League nung football asaya aser tanga continental club tetoktepba tem atongzüka asayatsü atema Hong Kong nung anogo 21 quarantine asütsü lateter aliba agintsü atema sorkari asadangdar, ta local osangkaket kati Deobarnü ashi. Yimti nung Home Affairs Bureau-i, Hong Kong Football Association-i Asian Football Confederation (AFC) ayongzüka asayatsü atema bid asütsü benokba pusema liasü, ta South China Morning Post-i metetdaksü.

"Hong Kong nung tazüokba ka kübok international asayamungtem tanaben tenzükhia asayatsü renema lir ta temaitsü sayutsü tang mapa shidak lir," ta source kati ashi.

Quarantine asütsü ozüing tesashi benoka aliba den senzusenpongtsü asoshi tenokdangba agütsür aliba ajanga Asia nungi asayar aser ketdangsertem Hong Kong-i moteti lir.

Asian Champions League aser AFC Cup nung asayatem ayongzüka asayatsü atema

Hong Kong-i bid asütsü renema lir. Covid-19 tashidak pokteter aliba ajanga asayamung ana ya tetenzüklen telok küma lemsar asayatsü asoshi AFC-i bid asütsü jaokba sülen parnoki tang asadangdar.

Taoba küm alima ajunga wara agi asüngba ajanga AFC Cup thitsü asre kasa mapang nung Asian Champions League aiben thinenba sülen Doha nung December ita asaya koba South Korea club Ulsan Hyundai-i akok.

Hong Kong champions Kitchee, taküm Asian Champions League group phase nung asayatsü atema qualify süogo aser kasa mapang nung Eastern & Lee Man AFC Cup nung asayatsü.

South China Morning Post-i ashiba agi, Thailand nung Buriram yimti-ia asayatem ayongzüka asayatsü jangraba lemsatepogo. AFC-i taruba hopta asayatem atema telemtetba agitsü.

Tanga yimtittem ama Hong Kong bo tashidak agi kanga sashiabo mekongshi saka Hong Kong nung asayatsü aliba international asayamungtem ajak thinen mesera thitsüogo.

## BILEMDANGANG

**"Aika kar yariba dang nungibo makasümonga odang yariba tajungba."**